

Seminario pa formacion politico diahuebs awor

Dos ex-Gobernador lo trata e topico di funcion di Gobernador den Reino Hulandes

Prof. Jaime Saleh y Mr. Olinda Koolman lo elabora riba e dos tareanan: Hefe di Gobierno y Supervisor di trabou di Gobierno

ORANJESTAD—Kico ta e 'Funcion di Gobernador den Reino Hulandes?' Esei ta e pregunta cu dos ex-Gobernador, Profesor Mr. Jaime Saleh y Mr. Olinda Koolman lo contesta durante un lecturaorganiza pa Instituto di Formacion Politico Digna Lacle Herrera. E Instituto a keda funda April e aña aki cu e meta principal di contribui na formacion di personanan cu interes den politica. "E ta interesante pa mira cu pa

cada profesion, mester di un diploma, un formacion. Pero te awe nos no ta rekeri ningun formacion pa nos lidernan politico. Y ta p'esei mes nos a lanta e fundacion," Mr. Luciano Milliard, miembro di e fundacion a bisa ayer. Otro miembronan di e fundacion ta Mr. David Kock, drs. Frederick Nuboer, Sra. Angele Martijn, y drs. Paul Croes. Segun Mr. Milliard, e ta un honor grandi pa por a logra

haya cooperacion mesora di e dos ex-Gobernadornan, kendenan a reconoce e balor di un lectura asina. Cada un di e oradornan a sinta 12 aña como Gobernador, y kier comparti nan experiencia amplio di den e funcion ei. "E posicion di Gobernador ta hopi importante na Antiyas, pais Aruba y den Reino. Manera cu tur hende sa, Gobernador di dos funcion. E ta cabezante di Gobierno di Antiyas Hulandes of Aruba, y den cuadro di tal, ta representa Su Mahestad La Reina. Pero Gobernador tambe tin e funcion di Supervision riba Gobierno, ora ta trata asuntoonan di Bon Gobernacion of Extradicion. Gobernador e ora tin e tarea di Supervision riba e Gobierno local," Mr. Milliard a bisa.

EX GOBERNADOR NAN LO CONTESTA PREGUNTA

Durante e anochi, tanto Mr. Saleh como Mr. Koolman lo elabora riba nan experiencia, con nan mester ehecuta nan responsabilidadnan y tambe lo papia e 'Forum Privilegiado,' cu ta un areglo unda e funcionario di Gobernador (pues un Gobernador den funcion), den caso di comete un delito, mester aparece dilanti Corte Supremo (Hoge Raad) y un Cuerpo di 10 huez, enbes di Corte di Prome Instancia of Hof (unda tin 5 huez pa delibera riba e caso). Procurador General na Hoge Raad tin e responsabilidad di guia e proceso aki.

Ambos ex-Gobernador a acepta e invitacion mesora, ya cu nan tambe ta kere den formacion y di e forma aki ta duna nan contribucion pa e proceso aki. Durante e seminario, ambos ex-Gobernadornan lo presenta nan topico, y lo contesta pregunta di publico. Ta keda na nan, a base di nan secrecia di trabou, cu ta keda vigente,



kico por y con lo contesta pregunta di publico.

Mr. Luciano Milliard, un experto riba tereno di Derecho di Constitucional, ta mira e discusion actual riba futuro di e islanan di Antiyas Hulandes como uno hopi interesante, y sigur significativo. No tin duda cu e cambianan estatal por tin efecto riba e posicion di Gobernador. Gobernador lo por haya mas tarea di supervision. "Y si esaki ta e caso, kizas lo tin efecto pa e posicion di Gobernador di Aruba tambe," Mr. Milliard a ilustra, enfatizando cu e seminario ta e prome biaha cu ta toca e funcion di Gobernador, pafo di Universidad, y ta prome biaha cu dos ex-Gobernador a acepta pa papia riba tema.

PAKICO DIGNA LACLE HERRERA

E miembronan a scohe e nomber di Digna Lacle Herrera, como un persona cu a destaca den tereno di formacion. Te hasta awor cu e ta pensionado, Sra. Lacle Herrera, despues di a traha como maestro y como politico, ta sigui scirbi su articulonnan pa publicacion. Mas ainda, e fundacion kier a enfoca riba logronan di un hende muhe na Aruba.

E fundacion a organiza caba cursonan, por ehempel riba Presupuesto y Economia, pa duna hendenan na Aruba



kico ta Presupuesto di un pais, kico ta e diferente 'postnan,' con ta trat'e den Parlamento.

Ademas, tanto Sr. Paul Croes como Mr. Milliard a biaha pa Boneiro algun siman pasa, pa duna curso di Derecho Constitucional na un grupo di politico hoben di e partido Union Patriotico Boneiriano, riba invitacion di e partido. Y ta den e cuadro ei, ta organizando e simposio pa yuda comunidad haya mas conocemento riba e tereno, den e caso aki, e funcion di Gobernador.

MAS LEU CU AFILIACION POLITICO

E fundacion 'Instituto Formacion Politico Digna Lacle Herrera' ta lanta dor di partido di AVP y e hala scientifico di AVP, esta FESCA. Pero asina mes, Mr. Milliard no ta mira cu esaki mester stroba personanan cu otro afiliacion politico pa participa y probecha di e seminarionan cu e fundacion ta organiza. "Nos ta consiente di un polarisacion cu ta existi na Aruba. Pero, nos mester por yega na un madurez politico, cu ora un hala di un partido politico organiza algo, cu representantenan di otro partido tambe por atende esaki."

Mr. Milliard ta uza como

ehempel, con Partido Red a organiza un evento durante aña, cu den su pensamiento tabata hopi bon. Aunke cu e representantenan di e otro partidonan politico a atende e evento a titulo personal, Dr. Milliard ta considera esaki un paso den bon direccion. Unicamente pa medio di stapnan chikito por trece partidonan politico mas serca di otro. "Laga nos dal stapnan chikito, y no perde speranza."

FORMACION POLITICO

E enfoka ta pa contribui na formacion di politiconan actual y tambe esnan di futuro. Recientemente, Mr. Milliard hunto un docente nobo na Universidad di Aruba, Mr. Cabenda tabata na Parlamento unda a duna un curso riba Constitucion pa Parlamentarionan. Mr. Milliard a considera e curso specifico aki como uno exitoso, den sentido cu masha poco hende abiertamente ta admiti di no tin cierto conocemento. Pero, cu den su observacion, poco poco por mira otronan bin dilanti y ta mas habri pa formacion. "Nos no tin cu lubida, cu ora di duna curso, como docente bo tambe ta siña algo di practica."

DAVID KOCK

bisa. Den su pensamiento, e fundacion ta concentra riba e formacion, pa brinda tur integrante di comunidad, sin seleccion di persona y topico e oportunidad pa siña mas. "Si por duna un aporte na sociedad pa un desaroyo asina, e ta uno cu tur hende ta desea. Esta pa politica bai na un nivel mas haltu, independiente y obhetivo. Si esei ta asina, anto sigur lo mi kier contribui mi 'granito di arena.'"

David Kock no ta laga e coneccion entre e fundacion y partido AVP como un problema p'e y pa su trabou. Su enfoka no ta politica, sino formacion pa politiconan y stimula participacion di comunidad den e proceso politico. "Mi no ta wak esaki cu por liga mi na un partido

politico, sino cu ta liga mi na un desaroyo cu lo mi kier pa nos comunidad bai den dje." E abogado ta spera cu comunidad lo responde na e invitacion aki, pa segura cu tin mas curso den futuro.

E lectura/seminario mes ta tuma luga Diahuebs 16 di November, di 7'or y mei pa 9'or y mei di anochi den Renaissance Convention Center, y entrada lo ta 10 florin. Kaarchi ta obtenibel na oficina di Abogado David Kock den Emanstraat, y serca Mr. Luciano Milliard, na telefon 9656165 of 5823901 extension 240. Tambe por cumpri ticket na entrada. Segun organisadornan, e motibo cu ta cobra ta pa cubri gastonan pa organisa e evento.